

光緒重修安徽通志

重修安徽通志卷一百八十八

人物志

宦績十一

甯國府

吳洪矩涇縣人吳時罷會稽太守明影宋本北堂書鈔百三十七引吳書為廬江

太守有清稱徵還船輕載土時歲暮逐除者就乞所獲甚少矩

乃語之逐除人見土而去北堂書鈔三十八又七十五引宣城記太平御覽二百六十二引宣城記

同又御覽三十七引洪誤江五百三十廬江誤廬陵嘗勸率里黨引水溉田以時蓄洩備

旱潦今涇縣有洪陂洪堰洪塘皆其遺澤事實清冊禮部奏摺

國朝同治四年准祀鄉賢祠禮部奏案新摺

唐左震涇縣人瀘州都督難當之曾孫也以贊善大夫出為黃

州刺史黃人歌曰我欲逃鄉里我欲去墳墓左公今既來誰忍

棄之去時王璵以祠禱見寵肅宗不豫太卜云祟在山川璵乃遣女巫乘傳分禱天下名山大川中使監之因緣爲姦所至干託長吏以邀賂遺一巫盛年而美以惡少年數十自隨宿於黃州傳舍震晨至驛門破鑄入曳女巫階下斬之悉斃所從少年籍其贓數十萬請以其贓代貧民租中使發遣歸京帝聞而慰獎遷商州刺史後判金州刺史

國史補 新舊唐書王璵傳 容齋四筆 黃州府志

羅立言宣州人貞元末擢進士魏博田宏正表佐其府改陽武令以治劇遷河陰立言始築城郭地所當者皆富豪大賈所占下令使自築其處吏籍其濶狹號於眾曰有不如約爲我更完民憚其嚴數旬畢無田者不知有役設鎖絕汴流姦盜屏息河南尹丁公著上狀加朝散大夫改度支河陰畱後後繇廬州刺史召爲司農少卿與鄭注李訓善訓擢之爲京兆少尹知府事

遂罹甘露之難

唐書王璠傳

南唐刁彥能字德明上蔡人父禮徙家宣州彥能少孤事母篤孝初隸節度使王茂章茂章叛吳奔於吳越彥能扶其母俟於路泣而告曰老母在不能舍而從公茂章許之乃馳還宣州而城中已亂彥能給曰我從王府來大軍已近爾輩無妄動眾信之稍定徐溫聞而嘉之以爲軍校使事其子知訓彥能警敏知知訓必敗乃歸心於知誥知誥代吳入爲環衛遷至天威軍都虞候左衛使金陵數大水秦淮溢東關尤被害彥能請築隄爲斗門水患稍息歷至建州畱後撫州節度使保大末卒

南唐書本傳

宋李含章宣城人少隱玉山好學工文詞每遇良夕輒吹鐵笛吟嘯自若太平興國中擢進士廷試春雨如膏賦太宗稱善嘗判戶部度支歲計充羨奏免諸道供輸一年祥符末判三司出

知本州政崇簡易所著有仙都集五卷孫孝先字玠叔以含章
蔭累官虞部員外郎通判池杭二州力學好修著有柯山集十
卷六世孫兼知台州有惠政卒官祀名宦著有雪巖集

周益公題跋

萬姓統譜

許元字子春宜州宣城人以蔭爲太廟齋郎累遷國子博士監
在京權貨務三門發運判官江淮歲漕不給京師乏軍儲范仲
淹薦元可倚辦擢江淮制置發運判官至則悉發瀕江州縣藏
粟引千餘艘轉漕而西朝廷以爲任職就遷副使特賜進士出
身後擢天章閣待制再遷郎中歷知揚越秦州卒元初爲秦州
軍事推官戍兵千人海上亡歸州守不知所爲元叱執倡首三
人餘悉勞遣知丹陽縣舊制盜決練湖水者罪死會大旱元請
借湖水溉民田不待報決之守遣吏按問元曰便民罪令可也

宋史本傳 萬姓統譜 江南通志

刁衍字元賓彥能子也南唐時爲祕書郎集賢校理以文翰入侍後入宋獻聖德頌上言淫刑酷法非律文所載者望悉禁止

從之仕至兵部郎中直祕閣崇文院

十國春秋 刁彥能傳

凌策字子奇宣州涇縣人幼孤厲志好學會與姚鉉同學於廬

州

幼孤以下舊志別載廬州府流寓今移并

雍熙二年進士起家廣安軍判改西川

節度推官通判定州李順之亂眾多憚行策自陳三蒞蜀諳其

民俗卽命知蜀州徙藤州還朝命爲廣南西路轉運使入爲戶

部判官先是嶺南輸香藥瑯卒萬人分鋪二百負擔抵京策請

陸運至南安汎舟而北止役舟八百大省轉送之費命知廣州

廣英路自吉河趣板步二百里盛夏瘴起行旅多死策請由英

州大源洞伐山開道直抵曲江人以爲便遣知青州東封以供

億之勤起拜都官郎中入判三司三句院出知揚州時洪州水
王旦言策泣事和平可寄方面卽以江南轉運使授之饒州產
金禁商市鬻或有論告逮繫滿獄策請縱民販市官賣其算人
甚便之復知益州初策登第夢人以六印加劍上遣之後往劍
外凡六任時以爲異自蜀代還拜給事中權御史中丞時權茶
之法弊甚詔策同議經制稍寬其舊疾甚復表求典益按歐陽永叔錢
治墓表作求典尋遷工部侍郎從其請天禧二年卒錄其子將
本郡與史文異宋史作監主簿瑾琬並爲奉禮郎策兄簡官國子博士分司南京

本傳

梅詢字昌元宣城人進士及第召試中書除集賢院李繼遷攻
靈州詢請以朔方授潘羅支自攻取帝問誰可使詢請行未至
而靈州陷還爲三司戶部判官屢上書論西北事請遣大臣臨

邊督戰募遊手擊賊又論曹瑋馬知節才可用傅潛楊瓊敗當

誅田紹斌王榮等可責其效以贖過凡數十事其言甚壯歷濠

州池州知廣德軍興學校敦教化政績甚著

興學以下舊志廣德州名宦引一統

志文今移并累遷給事中知審官院仁宗讀正說養民篇覽歷代戶

口之數問天下今民籍幾何詢對曰先帝所作蓋述前代帝王

恭儉有節則戶口充羨賦斂無藝則版圖衰減五季彫耗太祖

受命而太宗真宗休養百姓戶口倍於前矣因詔三司及編修

院檢閱以開出知許州卒子鼎臣舉進士歷翰林學士上飛白

書墨莊二字賜之曰美卿世居文翰之地也

宋史本傳

施元長字處仁宣城人天聖丁卯進士調饒州推官歷兩浙提

點刑獄行部越州諭鑑河不可爲田利害甚悉治平中知洪州

建學校定章程務以德義鎮俗後官兵部郎中子縝知鄆州築

隄綠山鄉人德之府志

楊佐字公儀宣城人舉進士爲陵州推官州有鹽井深五十丈底用柏木爲幹垂綆而下方能及水歲久幹敗欲易之而陰氣騰上入者輒死惟天有雨則氣隨以下稍能施工晴則亟止佐教工人以木盤貯水穴竅灑之如雨如是累月井幹一新累遷河陰發運判官皇祐中汴水殺溢不常佐度地鑿潰以通河流京城地勢南下夏秋則苦霖潦佐開永通河疏溝洫出野外水患遂息又議治孟陽河以轉京東粟從之歷位至鹽鐵副使天章閣待制知審官院再使契丹卒於道宋史本傳

趙稹字表微其先單父人徙於宣擢進士第歷位益州路轉運使眞宗諭曰蜀遠而數亂其利害朕所欲聞稹至蜀一日章凡數上蒲江縣捕盜不得逮繫平民楚掠誣服稹行部審其冤悉

縱之屢擢右諫議大夫知益州度支市錦六千匹召工計歲織裁千餘匹止以歲所織數上供官至禮部尙書太子少傅卒贈

太子太保諡僖質

宋史本傳

楊嶼字器之宣城人天聖進士知袁州衢信二州民爭水利委嶼決之嶼曰衢上流水所自出然衢民頻泄水外河溉不及信爭由之起其著令先衢而後信訟遂平

江南通志

王知微字幾之宣城人慶歷中登第僉判賀州鼓鑄歲增課百萬遷祕書丞知當塗縣時築萬春圩調夫甚急知微請俟農隙部使者不悅既而重之與王安石同年嘗問以法度沿革知微惟言士去就有命名器非假人物坐是不進用仕終龍川倅

江南通志

通志

劉琦字公玉涇縣人父湜景德乙巳進士自宣徙涇琦博學強

竄立志峻潔以都官員外郎通判歙州召為侍御史建言自城
 綏州數致羌寇宜棄之浙西開漕渠役甚小使者張大其事以
 功遷官詔琦就劾人人惴恐琦但按首謀二人而已與劉述錢
 顥共劾王安石上疏曰安石任一偏之見改立新議以害天下
 首建財利務為容悅奏上安石奏貶琦監處州鹽務後通判鄧
 州而卒年八十一

宋史本傳參用劉述傳

左彥武涇縣人嘉祐辛丑進士歷遷判無為軍措置得宜能聲
 大著累官至京兆尹卒

甯國府志

鍾清卿字表臣旌德人嘉祐戊辰進士官潭州觀察推官以清
 謹聞凡攝長沙等五邑並有善政後令分宜秩滿百姓請畱不

獲調漣水告歸

甯國府志

汪齊字子思涇縣人慶曆丙戌進士累遷尚書都官員外郎時

行青苗免役法齊詣朝堂力言不便王安石曰此法便天下獨

公不便爾遂出判池州

一統志萬姓統譜

王薦字繼道宣城人熙甯丙辰進士元豐末知歙縣勸學興起

教化時行差役法薦下令戶以一人受書則免其役人人競勸

學徒日眾築歲寒亭環以松竹哦咏其閒獄訟大減

蔣之奇歲寒亭賦

歙縣志

王平字裔中甯國人熙甯丙辰進士甯國以進士舉者自平始

補韜略尉邑民與僧爭水利平曰水源出於寺然寺所利者磴

礪耳民所資者賦澮竟予民嘗驗毆死者曰尙可生救之竟蘇

其涖事精敏如此

江南通志

劉拯字彥修南陵人進士及第知常熟縣有善政縣人稱之歷

官至吏部尙書權密直學士

宋史本傳

徐勣字元功南陵人舉進士王師討交趾轉運使檄勣從軍郭
逵宿留不進勣謂副使趙崑曰師出淹時而主帥無討賊意何
由成功因具蠻人情狀疏於朝逵果以無功貶通判通州瀕
海有捍隄廢不治勣躬督築之隄成民賴其利徽宗立擢寶文
閣待制兼侍講遷中書舍人修神宗實錄帝謂勣以擇相之難
云已召范純仁韓忠彥勣賀曰得人矣遷給事中上疏陳六事
曰時要任賢求諫選用破朋黨明功罪又因論棄涇州請自今
勿妄興邊事無邊事則朝廷之福有邊事則臣下之利勣初與
何執中偕事帝於王邸蔡京每曲意事二人勣不少降節俄而
遭憂京入輔摘勣行章惇詞以爲詆先烈入黨籍中大觀三年
起知太平州入覲極論茶鹽法爲民病帝曰不見卿久今日乃
聞嘉言加龍圖閣學士留守南京終不復用以疾卒年七十九

贈資政殿學士正奉大夫勤爲帝所禮重而不至大用時議惜

之

宋史本傳

韓元龍字子雲其先真定人後徙宣城以蔭補將仕郎爲天台令縣久不治賦入無籍悉力區畫至忘家事有疏豪滑姓名來告者謝不納曰一入吾耳卽不以善良待之何以自新聞者感化除司農主簿論屯田利病及榷場互市責任不一歷右司農卿出爲浙西提刑奉祠卒元龍性孝友與弟尙書元吉並以文學顯時比之坡穎

浙江通志甯國府志

章元任字莘民宣城人紹聖甲戌進士歷溧陽令歲大水道殓相望爲乞上官諭大姓焚舍煮糜飼之御史周武仲以狀聞累

官朝奉大夫

甯國府志

李回太平人崇寧癸未進士紹興元年歷位至同知樞密院事

元懿太子薨高宗未有後昭慈聖獻皇后自江西還感異夢以告帝會有僕射范宗尹造膝以請詔選太祖之後爲嗣回奏曰藝祖不以大位私其子今陛下爲天下遠慮合於藝祖可以昭格天命帝大感歎遂育孝宗於宮中國本乃定

宋史孝宗紀甯國府志

方懋德字元相南陵人起家胄監授武康尉有句者死或以誣富人沈氏獄已具懋德辨而釋之歷錢塘令知廣德軍未赴卒

有雲溪野老集

江南通志

章夏字彥明甯國人開封府薦第一大觀己丑進士調宿州司戶參軍歷潭州通判並有惠政所著有湘潭集弟復字季常宣和甲辰進士知丹陽修練湖民不告勞後歷御史中丞出知太平州婺州所至以廉謹稱曾孫一桂亦登第除太平州司理與守爭囚是非拂衣歸

甯國府志

鮑若虛字仲實涇縣人值軍興以軍功補官靖康元年使金爭論疆圉雄辨不屈被囚於歸化州十餘年始得釋還追念二帝

作詞二閔情辭愷切後以武翼郎致仕

萬姓統譜

汪汝則字方叔涇縣人爲蕪湖丞助平方臘有功帝嘉其能錄姓名於屏授紹興通判歷知衢信二州有惠政時臣僚登對論郡守才帝曰使人人如汪汝則何患不治子琰仕鄞縣有聲琰

任吳縣尉射獲強寇三十餘人升池州通判

江南通志甯國府志

于鵬甯國人爲岳飛幕屬從征有功秦檜万俟卨陷飛偪鵬等

爲左證嚴行考掠不承飛死鵬等論罪有差

宋史高宗紀岳飛傳

陳天麟字季陵宣城人紹興戊辰進士爲廣德簿歲饑代郡將爲書請部使者得粟數千斛以賑歷知襄陽修治城堞募忠義軍浚古晉河察城中奸細誅之改知贛州預爲守備寇不敢犯

辛棄疾討賊所俘獲者悉送贛獄天麟惟治其魁脅從者俱得

末減入爲集賢院修撰卒

一統志 宣城事
面 江南通志

昌永字禹功涇縣人初以三舍法入辟雍靖康二年金兵犯京

師永倡太學諸生守義不屈紹興辛未以特奏名第一同進士

出身授太常寺丞歷至淮東參議又昌森者字元秀爲廣濟尉

以捕盜功知固始縣歷知英連二州

萬姓統譜

孫林字德操太平人紹興甲戌進士歷判池眞郢三州所至以

均稅省訟興學節財爲務入覲論及公生明上問何以生公對

曰廉生公又問何以生廉對曰儉生廉上稱善遷知太平州移

溫州朱子稱其愛立而教明古良吏也

一統志
江南通志

梅成和字德修涇縣人紹興壬子進士調江夏簿岳飛討楊么

於洞庭湖安撫使劉湜守鄂渚令督軍儲掌箋表賊平授太湖

令賑恤流移興崇學校嘗取唐人所列聖賢往行合於十義者

繪圖刻石以訓示

萬姓統譜
江南通志

吳時顯字元明涇縣人紹興庚辰進士初尉江陰歷廣南東路

轉運判官所至以廉能稱

甯國府志

虞儔字壽老甯國人父璠隱居西山有高士風儔登隆興進士

知績溪與本邑鄰食飲服用盡取諸家諸司列其治狀歷監察

御史排擊貴近綱紀肅然出知湖州力行荒政多所全活遷淮

東副運入爲太常少卿充金使累官兵部侍郎卒

江南通志
甯國府志

章燾字彥溥宣城人以蔭補廬州戶曹歷位至大理少卿坐事

罷起知復州復知蘄州蘄產竹簞例充苞苴悉斥去之提點湖

南刑獄全州兵劫守臣爲亂燾諭遣其眾誅一二首謀者乾道

初除大理少卿拜刑部侍郎燾練習條章議獄傳以經術時論

推其平允以疾奉祠卒年八十二

一統志湖北名宦
甯國府志

林宗放字問禮宣城人淳熙丁未進士教授通州學有舊刊三諫集載章惇姦狀適惇孫爲郡守欲去其板宗放執不予調太平州來學至數百人宗放升堂辨析發明至理改知蘭溪縣摧折豪強奸吏屏氣邑號大治遷廣州通判番禺海舶例有私獻卻不受乞祠歸

萬姓統譜

文案字南甫涇縣人淳熙戊戌進士累官至御史抗疏三上災

異事直指權相忤旨罷歸弟中字正甫士南字山甫皆相繼登

第

江南舊志
甯國府志

楊若字又先南陵人紹熙進士知祁縣有明恕稱累遷至全州興學校創賑濟倉減輸租浮解移信州後以朝議大夫直寶章

閣致仕

甯國府志

奚士達字必達甯國人淳熙乙未進士教授復州改績溪提轄
左藏庫簽書淮南判官致仕初達與同舍郎沈渙講習禮經相
勉曰曲禮毋不敬大學毋自欺富終身行之弟士遜與達同登
進士累官至大理卿韓侂胄死史彌遠議起大獄士遜曰廷尉
天下之平侂胄誠奸若加以大逆非所敢知遂忤旨罷子祝亦
舉進士佐郡有聲

江南舊通志
萬姓統譜

汪晦之旌德人淳熙甲辰進士倅江陵郡郡有三海八櫃特爲
險固豪右據以爲田乃力復之時券法初變晦之流通錢幣又
築寸金隄以捍江厥功甚偉遷監左帑遂乞歸

江南通志

吳潛字毅夫宣州人

按舊志作宣城人今依宋史吳柔勝傳更
正又宋史及一統志吳潛傳俱作甯國人

祕閣修撰柔勝之季子嘉定丁丑進士第一歷遷尙書右郎官
都城大火上疏論致災之由願齋戒恐懼不徒減膳撤樂又遣

史彌遠書陳六事歷太常少卿淮西總領告執政與元爲鄰當
以和爲形以守爲實以戰爲應今內郡窮困不宜輕議用兵其
後淮師敗亡皆如潛言端平元年詔求直言陳九事忤時相罷
復起再疏請養宗子以係國本以鎮人心歷端明殿學士簽書
樞密院事封金陵郡侯淳祐十一年爲參知政事拜右丞相兼
樞密使明年以水災乞解機政又四年授沿海制置大使判慶
元府條具軍民久遠計以久任乞祠晉封崇國公判甯國府還
家復召入對拜特進左丞相進封慶國公改封許國公上言忠
賢空虛名節喪敗因劾章鑒高鑄丁大全沈炎等不報卒以沈
炎論劾落職責授化州團練使循州安置預知死日撰遺表作
詩頌端坐而逝德祐元年追復原官後贈少師

宋史本傳

文小二字佐甫涇縣人嘉定二年任南陵主簿居官仁愛考績

當遷父老泣留遂致仕卜居分界山

甯國府志
志流寓

新舊

饒虎臣字宗召甯國人嘉定甲戌進士知徽州歷遷司農卿兼知建甯府大雨彌旬虎臣憂曰民其魚乎分遣官吏撫恤之全活數萬人興學校建城堡節冗費府藏積至五十餘萬以廉謹稱官至參知政事卒之曰至鬻賜器營葬

宋史
本傳

胡伯虎字用之甯國人少從呂東萊遊登淳祐丁未進士除和州防禦判官有善政弟季虎用虎先三年同登進士季虎官徽州倖權發遣桂陽軍奏事行在疏陳大學正心之旨董仲舒天人感應之言上賜嘉獎用虎仕至光祿少卿

甯國府志

章炎字子美太平人寶慶丙戌進士官鎮江通判有治聲知常州還拜殿中侍御史彈劾無所避出爲江西安撫使知江州以忤丁大全解職

一統志

焦炳炎字濟甫太平人淳祐辛丑進士知袁州新喻尉楊大明
嘗誣一姦婦罪炳炎爲雪其冤後爲右正言以言事忤當軸作
詩貽知舊云事至諫官言不得身爲宰相有何榮遂解職歸南

通志

方處和字德修旌德人官玉山丞有黃姓者夜餽以金怒而麾
之比歸復以班竹杖爲贓怪其重劄之果得金復斥不受其廉
介如此

江南通志

仙源字士賓甯國人襄樊失陷從師江上爲籌畫善後之計厥
功甚偉理宗下詔褒之

甯國府志

湯肇菊字士華旌德人知肇慶府有惠政去官口贖送一無所
受民爲立祠

甯國府志

王三益太平人官固始簿爲政酌輕重權緩急追呼不擾而事

自集人愛之如父母

甯國府志

元施正大字清泉涇縣人至元開丞相巴延下江南辟爲本縣尹初縣治在水西時苦漂蕩正大始徙於水東至今利賴又學舍鄰大安寺爲僧侵據正大與教諭賀桂孫請於部使者復之

江南通志 舊志名宦 新移

貢師泰字泰甫宣城人早入胄監泰定四年釋褐擢應奉翰林文字除紹興路推官山陰白洋港一船飄近岸有史甲者見船無主取其篙船有二屍眾以爲史殺史傭富民高家史旣誣服高亦就逮師泰密訪之則里中沈姓者自杭回爲漁者所殺其冤始白又治游徼徐裕殺人罪以白諸暨商人之冤治行爲諸郡第一復入翰林預修后妃功臣列傳至正十四年除吏部侍郎奉命和羅浙中得糧百萬以給軍除禮部尙書未赴調平江

路總管甫視事張士誠兵自高郵抵城下守將遽去師素亦懷
印匿海濱江浙行省丞相達識帖睦爾命權本省參政十九年
除戶部尙書俾分部閩中以閩鹽易糧十萬石由海道轉漕京
師朝廷賴焉未幾召爲祕書卿行次海甯卒

元史本傳

陳良弼字公輔宣城人少辟憲史有聲除嘉興路教授律身教
人皆存古道一錢斗粟不入私室調上元簿坐伉直免吳師道
稱其才足濟事辨足服人知足自衛眾謂其知言

新江通志

王廷字美宗南陵人元貞二年除益州教授創置學宮廟廡及
祭器士民悅服廷性寬和友愛葬祭一遵古禮稱貸不能償者
舉券焚之有古君子風邑人尊之曰南澗先生

甯國府志

盧禮字仲敬太平人至順元年知崇德州時旱澇相仍民多流
散禮捐米賑濟州境晏然

浙江通志新増

劉禮之字德茂宣城人至順中辟授光山尹自矢冰檠爲民所

頌尋遷廣州刺史南國府志

明張椿字德茂宣城人洪武初知鄒平時齊魯初定民物凋敝

椿創學校建公署崇祀典旌孝弟士民德之鄒平縣志

魏資敬字之觀宣城人宋參政魏良臣自溧水遷宣城資敬其

後也洪武初爲棗強丞有治聲擢監察御史以敢言稱南國府志

李撫涇縣人洪武中官安鄉縣丞剛正不阿遇旱賑濟尤有方

略湖南通志

吳原頤字師程宣城人洪武庚戌以明經辟司訓遷國子博士

壬午典江西鄉試永樂閒預修大典子襄爲郡陽令有聲同邑

王士謙亦以司訓辟召修大典南國府志

王昱字永熙涇縣人洪武初以貢入太學直陳時政謫景陵典

史升銅梁知縣以廉幹薦授合州知州卒官櫬歸老幼悲號奔

送

甯國府志

梅奇涇縣人洪武閒知安陽縣救荒愛民民懷思之

彰德府志

秦達字文用宣城人洪武乙丑進士歷任都察院奉檄清理囚徒寬嚴得宜擢工部侍郎議定輪班匠法量地遠近爲班次更番輪作免其徭役進尚書上以國學爲儲材地而士子巾服無異胥吏命達製式以進凡三易其製始定明代士子衣冠創於

達云

明史薛祥傳

戚遜字彥志宣城人洪武中以貢授兵部主事永樂閒歷山東參政歲饑流移載道請於朝不待報輒發粟賑之賴全活者無算詔獎賚遷交趾布政引年歸卒

江南通志

芮麟字志文宣城人洪武閒累官至台州府以里誤被逮父老

泣送境外移守建甯歲饑民困發粟以濟郡有上下關衛分兵

戍守小人倚爲姦利商旅苦之麟疏其弊得罷同邑潘惟學知

嚴州府亦以慈惠稱

一統志浙江福建名宦
江南通志甯國府志

左洋字有瀾涇縣人洪武時官大理評事有聲升刑部員外郎

永樂二年設八百媳婦軍民宣慰司二以土官刀招你爲八百

者乃宣慰使其弟刀招散爲八百大甸宣慰使遣洋往賜印誥

冠帶襲衣命五年一朝貢遷禮部祠祭司員外郎拜應天府丞

卒於官

明史雲南土司八百傳

洪秉字叔亮甯國人洪武初應求賢詔授都司斷事旋授登州

衛經歷永樂二年命清遠伯王友充總兵官率舟師巡海秉治

戰艦有功除浙江道監察御史擢江西布政以母老乞歸

甯國府志

劉希賢宣城人爲餘姚主簿卒於官同僚檢其篋止俸銀五錢

帕二方縣爲斂其喪歸之

江南通志

丁鉉字永時南陵人永樂中以書法徵入國子監歷刑部郎中

出爲兩浙都轉運使以廉能治行爲天下第一出使徐州以便

宜發倉賑濟擢河南右布政治益有聲景泰立召爲刑部左侍

郎

江南通志

范懋字士勉南陵人永樂閒以舉人授河西令遷隰州同知廉

明不可犯百姓以包孝肅稱之爲作思廉亭

江南通志

劉泳字溥淵涇縣人建文己卯舉人授臨湘訓導歷獻縣浦江

蕭山教諭致仕卒浦江人爲位於白佛寺哭之私諡懿敏先生

南陵府志

許森字茂嚴宣城人永樂甲申進士知南充縣縣多豪民森約以法久之自戢民苦徵解皇木森革其例之不當應者爲尉所

諧謫爲民久之事白擢山東道御史謝官歸

甯國府志

王著字有輝涇縣人官按察使經歷以廉能稱嘗奉檄巡溫州久旱著禱輒應慈溪多虎竭誠禱神比浹旬斃十三虎民遂安

江南通志

貢珊字廷甫宣城人性孝友母疾嘗糞兄病疽吮之以進士知唐山縣覈清河官地以還民時以佛稱入覲卒於京唐山民奔走哭奠爭出車錢護其喪歸

江南通志

楊三省號紫凝太平人以選貢入北雍試第一授江西安義令居常沈默寡言遇事剛斷劉把總僕殺人當道置不問三省鞫得其狀立置之法值歲祲煮粥療飢告糴散種寬積逋籍糧額政聲大著升茂州知州番民悅服以剛直忤上官遷潞藩左傳遂引疾歸

江西通志
新增

貢璧字廷器宣城人由舉人歷官監察御史成化中疏言星變
憲宗特識其名於御屏命巡視南畿江防中貴人多冒禁持法
不少貸遷浙江僉事卒

甯國府志

秦銘字日新南陵人由國子生官陝西知州以薦擢本省參政
歷任二十餘年廉介有聲

甯國府志

程富字好禮涇縣人以舉人官浙江按察司照磨湖廣按察司
巡檢有廉幹聲擢御史提督北京學政本郡舊苦養馬富爲疏
免一郡德之

甯國府志

劉伯大字孟輝涇縣人永樂辛丑進士官御史彈劾不避權貴
巡按江西以星誤罷歸而清名益著

甯國府志

陶歆宣城人永樂十四年任吳川知縣勤於理政廉平儉約矜
恤貧民徭役甚均小民逃移者遣人招諭復業相率來歸七百

五十八戶又免其賦役俾各得所後因事解任民皆思之

廣東通志

增新

陳銓太平人任潮州府照磨府城外有妖出大石下每年祀以

人銓怒積薪石傍火發石裂震死一巨蟒妖遂絕民為立祠

甯國府志

府志

吳詔相字廷臣宣城人由鄉薦知汝州不畏疆禦州境肅清

江南通志

通志

左景字孟春涇縣人以舉人任山西陵川訓導擢河南道監察

御史改山西道捕盜畿甸平反誣坐死者十一人巡按雲南監

平麓川軍至曲靖苗賊犯境督兵力戰有功以忤重臣出為四

川按察使

甯國府志

王浦字景淵涇縣人以歲貢除泉州府經歷鄧茂七寇延平朝

廷遣梁瑤等討之溥爲畫策擒其魁復統兵剿除餘寇升本府

推官以廉能稱府志

曹慶字文吉涇縣人以歲貢知深澤縣升化州同知單騎招諭

島寇吳威等州境以安府志

趙昌字鳴盛涇縣人景泰甲戌進士歷官戶部郎以事謫長沙

同知洞寇竊發昌悉平之成化初復爲戶部郎值蘇松旱災奉

使檢覈奏減秋糧三十餘萬民因以蘇累遷山東左布政卒府志

府志

汪讓宣城人景泰初知湘陰縣時罹火災官私廬舍蕩爲灰燼

讓料理區畫先學校次分司館驛修治咸有條理湖南通志

左仲輝涇縣人天順甲申進士歷戶部郎出知永州時新建藩

府王欲闢地仲輝阻之改知漳德府藩府之擾十倍永州咸御

以禮法置泉陂三所溉田五千餘畝歲凶多方捐賑全活者無

算

湖南通志
江南通志

林鶚字一鶚太平人景泰進士授御史成化初遷江西按察使
有犯大辟賄達官求生者鶚執愈堅廣寇剽贛州急調兵禦之
遞去廣信妖賊妄稱天神惑眾捕戮其魁立解散歷左右布政
使歲饑奏減民租十五萬石成化六年擢南京刑部右侍郎卒
贈尙書諡恭肅

江西通志
新增

張綸字大經宣城人成化甲辰進士知鹽山縣誅鋤姦惡奪貴
戚侵田擢監察御史嘗按眞定諸郡平鄉令欲增淤田稅檄報
淤決不常不可遺民患歷大理寺卿興襄二府爭灘地連逮七
十二家綸爲奏定事得息改刑部侍郎推治博野慶成二王獄
稱旨遷右都御史武宗時中官用事論劾巨璫蕭敬等罪當誅

疏久不下因乞歸

一統志明史七卿表

陳効字志學南陵人成化辛丑進士由戶部主事轉員外郎中先是諸倉輸賦者初至儲積於地遇淋潦米雜泥滓漂瀉腐敗効悉罄以石遂爲永利出知興化府大旱籍庫帑市穀賑饑請蠲歲賦在任八年百廢具舉升鹽運使凡裕民便商事爲之不遺餘力後以忤劉瑾歸

甯國府志

孫昊字曰民南陵人以舉人知海甯縣築隄捍海民賴以安昊以文學名督學戴珊所賞識有十才子以昊爲首

江南通志

王達字德孚涇縣人成化丙戌進士歷官南京戶部郎中嘗決鳳陽河南爭田之獄又發十三年之盜銀於倉地吏民驚服遷知武昌府斬妖僧繼曉擒妖賊道士李孜省立三等九則之法以均田役時守備太監假進貢漁獵小民奏革之湖湘水旱相

仍疏罷襄府營建以寬民力年五十致仕

江南通志

張景字存齋涇縣人以貢生爲荔浦令俗習弓弩尙漁獵景興

學校教農桑恩威並著獐獐感服升永安知州

涇縣志引荔浦志

沈淮字伯淵涇縣人成化丁未進士知益都縣俗遇歲旱擊枯

骨椿祈雨淮嚴禁之以誠禱輒應民饑發倉賑之卒於官子儼

扶輿歸里民爭餽不受曰吾父清白安敢受此辱先人

甯

府志

江漢字紀南旌德人成化壬辰進士歷戶部郎中西蜀旱饑奉

詔齋內帑賑之躬歷郡邑條畫周悉出知寶慶府首制豪猾不

得借勢宗藩區別兵民禁戢流散蠹弊盡革

江南通志

徐說字以中宣城人成化戊戌進士歷官南京右通政嘗冊封

靖江王資贍甚厚一無所取

江南通志

趙瑞字子祥宣城人以舉人官撫州同知嘗行縣遇二人鬪旁

婦人詈曰爾殺吾父今又戕吾夫耶瑞聞而追跡果得尸因置

其人於法後以彰德知府致仕卒年八十五

甯國府志

王蓋字舜功宣城人祖昌裔正統中以舉人知陽穀縣裁抑入

貢番僧以廉幹稱蓋登宏治己未進士在諫垣多所彈劾禁軍

橫甚至侵掠官物請治如法上命榜列東安門自是少戢從弟

遵正德辛未進士歷官左布政以清約著聞

江南通志甯國府志

謝斌宣城人正統末任撫州府同知樂安草寇竊發民多逃竄

斌設法捕獲罪爲首者貸其從招復逃遺各安井里人共稱之

江南通志

新增

孫忠顯字良輔宣城人官大理評事卹刑浙江多所招雪紹興

饑民求賑不得而鬨有司以劫糧報忠顯詢得其情大獄得息

南國府志

孫忠弼字良佐宣城人以舉人知河南鹿邑縣縣人文衰落忠弼構堂縣側聚諸生論文其中文風日振累遷順天治中未任

卒

南國府志

管涔南陵人成化中官桂陽州同知先是峒寇破桂陽公宇學

校皆被燬涔到官卽請修復如舊制

一統志湖南名宦

陳孜南陵人以舉人官霸州同知清理宣遼二鎮屯田升甯羌

知州川蜀賊起郡邑殘毀惟甯羌以守禦得全

江南通志

阮漣字重器南陵人官蕭山丞興利除害敢於有爲邑東濱海

築隄捍之民賴以安

南國府志

崔雲字時望南陵舉人知恩縣擒巨盜遂果升膠州守以父艱

未赴服除人勸之出雲歎曰向所以戀戀五斗者親在故也今

復何求哉遂築室基側以典籍自娛

甯國府志

趙履祥字旋夫涇縣人宏治庚戌進士由戶部郎出知贛州勸農興學禱旱弭盜政最擢鴻臚寺少卿尋謫守瀘州蜀寇未靖

悉心保禦升僉事備兵瀘州致仕歸

甯國府志

徐冠字士元涇縣舉人任隆慶州學正同王守仁分校山東鄉試又典試陝西江西遷都昌知縣以從征姚源寇功擢監察御史巡按貴州歷知吉安府廣東副使所至有聲同邑徐瓚以舉

人知興安縣亦以廉謹稱

甯國府志

重修安徽通志卷一百八十九

人物志

宦績 十二

甯國府

左然字允之涇縣人宏治庚戌進士官戶部員外郎廉明幹濟卒於官同族左暹以舉人爲武昌通判蒞事精敏以忤權貴罷又同邑章嵩者宏治乙丑進士以戶部主事權潯陽關執法革弊掎克不行

甯國府志

江文敏字克學旌德人宏治乙丑進士授南陽推官明敏果斷擢川東分巡道丁艱起歷河南河北道西羌梗化授松潘等處糧儲兵備副使威惠並行兵民安堵松潘俗務騎射技勇與之講經興學士風丕振

甯國府志

劉恕字宗行宣城人知武城縣有惠政當滿士民詣闕畱任三年其裔廷榮知和平縣王守仁討泃頭山賊請置縣控扼之廷榮承草創撫循餘寇保翼平民教其秀良以治行遷衢州判民爲立祠祀之南國府志

邵道宗字師魯太平人以舉人知樂陵縣立保甲保馬法縣境以甯世宗南巡供頓有程民不病擾調郟城修築沂河馬耳灣諸隄馬耳灣舊有神蛟據之屢築屢圯乃備牲祭告忽風霧中有物飛騰而去功遂成沂河礦廢盜賊繼起率土兵平之以病

乞歸江南通志

蕭瑞字吉夫涇縣人正德戊辰進士知靖安縣邑多流徙瑞一意撫循復業者千餘時奉新華林賊起以有備不敢犯調知廬陵立保甲清徭役備監察御史劾兵部尚書王瓊奸邪廷論

璉之歷山東僉事福建右參議致仕歸

江南通志

倪鶚字子薦涇縣人正德丁丑進士知江陵縣縣稱繁劇處之裕如政績大著人皆服其廉幹歷戶部員外郎遷貴州都勻知

府

南國府志

汪堅字子固旌德人正德庚辰進士歷刑部郎中按郭勛怙勢不法狀輦轂肅然歷任至河南參政致仕歸清德爲時推重

江南通志

通志

沈奎字文瑞涇縣人正德辛巳進士知巴陵縣升戶部主事遷

陝西道監察御史巡視河南江西風裁峻整所至有聲出爲岳

州知府

南國府志

吳大本字性夫宣城人正德辛巳進士知進賢縣儀賓李貴怙勢殺人多方求脫卒置之法擢河南道御史三疏論閣臣張璁

不職出爲廣東僉事決疑獄活趙集等三十三人終威茂兵備

副使

一統志

劉贊字誠夫宣城人以舉人知肥城蝗不入境調黃巖邑中豪貴多不法贊執正不阿竟中蜚語移判成都民悲啼走送勒石

道傍云劉侯與赤子泣別處

江南通志

梅繼儒字汝真宣城人官永豐丞勵操舉職八年如一日建學校興文教清覈冊籍邑人稱便遷解州判致仕歸卒巡撫宋儀

望爲立石題曰廉吏之墓

甯國府志

張本字有源宣城人官開封推官正直方嚴動必循法歸無餘

貲鄉人重之

江南通志

王木字近仁南陵舉人授廣信推官以廉潔著遷辰州適洞蠻拒命設策平之初辰俗不諳織紵木設機杼召民閒老嫗入署

使家人教之辰婦女始知本務

南國府志

江文中字克時旌德舉人任順天府推官執法不避權貴有大

獄讞奏不決文中持正舉劾爲當事所擠左遷濱州知州

南國府志

譚潛字見之太平舉人知嶧縣惠而能斷令行政舉大吏不便

其所爲謝事歸

南國府志

趙象字惟賢太平拔貢知慶雲縣多善政憲使聞其賢至署省

視圖書外無餘物歎爲天下清吏擢桂陽知州清節治聲並著

嘗曰秩俸外錙銖皆是賕私人服爲格言

湖南通志

姚本旌德舉人知冠縣多惠政遷知汾州與總制曾銑計復河

套曾銑爲仇鸞所中策不果用改知獨山土賊蹂躪本畫策戰

守咸中權宜邑賴以全

江南通志

徐楠字任之宣城舉人知耒陽縣振興文學遷撫州同知躬負

畚鍤築千金陂撫人建祠陂上攝郡事有御史居家不法楠按治之爲其所喉免歸子鴻起以舉人歷知衡州府多惠政未故衡屬郡人祠祀之題曰父子濟美一統志

徐祚宣城人嘉靖乙未進士知夏縣節用愛民民歡然若更生升監察御史山西通志

孫濬字宗禹宣城人嘉靖庚戌進士歷官給事中倭寇吳越趙文華撫師江上與巡撫曹邦輔相鄰濬疏論其希嚴嵩意修小怨忤旨謫孝感丞歷知平陽府平陽人祀之名宦祠兄潮字宗信以舉人知濟源有捕逐妖寇功濟人至今祠祀明史趙文華傳甯國府志

劉時達涇縣舉人嘉靖閒知大竹縣時寇賊嘯聚達密布方略捕獲二百餘人姦宄潛踪四川通志新編

唐汝迪字吉甫宣城人嘉靖丙辰進士司理真定有巨猾不受捕立收之一郡震懾補吏部郎以忤嚴世蕃謫禹州尋知雷州雷濱海倭寇一夕突至登陴授兵城賴以保擢河南治河副使河決崔家口有議開復舊河者上書言不便議遂寢遷廣西按察使卒予一諡天啟乙丑進士官泉州司理崔苒竊發單騎諭賊投誠以卓異升刑部主事

一統志江南通志

吳希賢宣城人嘉靖中知興國州勿便於民者悉裁之立忠節

祠祀謝疊山

一統志湖北名宦

許國忠宣城人同知處州歷攝府縣篆建議復浮橋於故陟泊鹽船於上河修學築壩止開採以杜覺隙擢處州府知府

浙江通志

增新

湯鑑字巖臺宣城人知彭縣每春日勸農爭訴者立馬解之歲

早躬自濬泉溉田數十餘頃民勒石曰湯公泉立祠祀之

甯國府志

殷登瀛字子登宣城人嘉靖壬戌進士知海甯縣期月宿逋盡

清案無停牘擢戶曹榷關作浴心亭以自況出知金華府乞休

歸子之輅字穉堅萬歷癸丑進士官福甯州畫策防倭州得無

警擢刑部主事出知福州府卒

分省人物考甯國府志

谷同字用中南陵人嘉靖十五年知上猶縣清介自持以培善

抑強爲己任豪民捍法必嚴治之洪水衝決西城數十丈同捐

贖鍰募工修築未嘗擾民

江南通志新增

徐元氣字汝和宣城人嘉靖壬戌進士官刑部員外郎以斷聞

氏姦獄忤執政指出守興化移成都出枉獄四十八人築灌縣

石堰歷雲南右布政士官岳鳳亂條上剿撫策事平調山東左

布政東省巨室優免溢額民苦賠累悉清核之仕終通政司卒

年八十一

江南通志

徐元泰字汝賢宣城人嘉靖乙丑進士官吏部主事分校禮闈以不錄張居正子左遷山東參政居正歿遷順天府尹時蜀中河東楊柳寨酋攻普安堡入金瓶堡殺守將巡撫維遵屬總兵官李應祥討之番恃險剽如故乃以元泰巡撫四川代遵其冬番突平夷堡元泰決計大征諸路兵悉集命遊擊周於德誘擒楊柳寨國師喇嘛與青海酋灣仲守備曹希彬擊斬青海占柯連拔諸砦焚碉房千六百有奇生擒賊魁三十餘人俘馘千餘計自是羣番震驚不敢爲患建昌越嶲邛部黑骨夷竝起爲亂元泰悉討平之邛部屬夷賦乃者地近馬湖其酋撤假安與數侵掠內地元泰徵兵令李應祥督諸將討之生擒二賊以其地置屏山縣論功進兵部尚書致仕

明史李應祥傳

童久仁涇縣人任樂清主簿以憂解任囊空無資潘令潢一夕坐堂上語縣民曰童君廉吏也今若此奈何語未畢民輸銀相

屬

浙江通志新脩

梅守德字純甫宣城人嘉靖辛丑進士授台州推官台臨海強族多闢出中國貨與姦民互市鉤致倭寇守德按治之擢吏科給事中時嚴嵩私人胡奎謀爲工部侍郎徐可成以道士累官工部侍郎掌太常卿復求故官守德兩疏論駁事皆得已嵩深疾之出爲紹興知府繕城蒐卒均田核稅民間稱便尋督山東學政陶仲文奉上命祈年泰山怙寵干請斥之弗爲禮遷雲南參政以母老乞養歸建書院講學世稱宛溪先生

一統志江南通志

張克家字有光宣城人嘉靖乙丑進士歷御史隆慶時太子出閣講學疏請復坐講禮謫濬縣丞起戶部主事累升雲南副使

卒甯國府志

戚慎字汝初宣城人嘉靖甲辰進士歷南刑部郎中方士鄧中挾術炫惑慎捕治之知雲南楚雄府銀廠三十餘所例有寄庫銀卽革除之會訊土司獄執法不撓中毒卒族有士宏者以掾吏起攝長沙縣擒劫賊招峒夷勞績甚著甯國府志

張真字仲理南陵人嘉靖丙戌進士觀政刑部卽疏黜貪污循良及任華容多惠政有十美十異之謠後官南京職方司員外致仕甯國府志

趙睿字若思涇縣人嘉靖壬戌進士由蕭縣知縣擢御史屬巡視十庫瑄報車駕幸西上門觀獅子請暫避睿正色曰臣備員執法職在補過拾遺主上來正宜班侍何避爲上聞卽斂輿還後爲雲南參政緬甸酋莽應裏叛以兵壁蒙化有功官至四川

左布政勤儉清廉終始如一志

汪全字體之南陵舉人判漳州府倭寇憑陵設策擒殲漳賴以

安旋致仕歸南陵府志

何燿字贊文南陵人嘉靖癸丑進士除行人司行人歷吏科都給事中時嚴嵩當國燿目覩其弊上疏條陳五事曰寬民力懲賊吏重糾察正士風禁奢靡得旨允行燿愈自奮隨疏帑藏匱絀早賜計處以濟時艱固邦本娓娓數千言方欲大用以疾卒

官

南陵縣志

汪鑑字衡夫南陵舉人知任邱縣毀淫祀惟存漢壽亭侯廟改知新樂清驛傳減馬價招集流移邑人德之遷岳州通判致仕

歸

南陵府志

蕭謐字子靖涇縣舉人判肇慶府廉惠有聲委征苗獍夷人懾

服卒於官

甯國府志

張炫字文光涇縣舉人知綏甯縣建明倫堂以造士又以山縣
簡僻請裁縣丞詔從其議擢長沙同知遷潮州時倭寇煽亂巨
賊張癭擁眾數萬據境炫單騎入其穴諭以利害卒就款服賜

白金文綺旋解綬歸

一統志湖南名宦

查絳字汝素涇縣人嘉靖庚戌進士任大理評事恤刑中州多
所平反出知真定府升浙江按察副使以平倭功進三品秩致

政歸

甯國府志

董鉉字仲宣涇縣人嘉靖癸未進士知桐鄉縣修荒政崇學校
邑人德之同族董珪字子純嘉靖壬辰進士由海鹽知縣擢御
史巡視江西以風力稱忤權貴謫歸

甯國府志

章文粹涇縣人任福甯州訓導講貫詩經要旨大有發明值倭

警閉城避倭之眾無所歸文粹以身任開門納之全活甚眾卒

於官士民千里奔送

福建通志
甯國府志

許汝驥字德卿甯國人父萬相知巫山縣爲民請於當事免權
茶之病汝驥成嘉靖癸丑進士歷戶部郎中值畿輔大饑請發
太倉賑之轉職方嚴嵩私仇爲欲越次敘功執不可景王之國
部委治丹潞河限以千艘民得不擾又閱視薊鎮軍實劾鎮帥
張承勛貪黷不法狀竝言督撫諸臣不任節制上爲動容仕終

河南副使

一統志

朱一柏字應真甯國舉人知嵯縣邑舊有溪環治若抱後南徙
科名衰落者三十年一柏乃計日興工爲復其舊新學舍立經
史鉛槧局月三課士親定甲乙是科獲雋者三人歷遷廣州同
知海氛犯境率士捍禦嶺表以安終慶遠府知府

甯國府志
嵯縣志

劉炎宣城人嘉靖初知和平縣時邑新造炎創公署建月城招民以實閭井修立學社擇民子弟教之平定羣盜邑賴以安

志廣東

名宦

屠義英字純卿甯國人嘉靖丙辰進士授戶部主事歷祠祭郎中督學浙江持法清嚴卒牘不行張居正禁講學義英曰官可棄學不可不明益與士大夫會講不輟遷太常卿掌南監事申嚴條約六館肅然上書春風化雨蔚爲人宗八字賜之南郡諸臣公疏請居正奪情義英獨不署名曰朝廷可無居正居正不可無母遂罷歸交薦不起卒贈刑部侍郎

一統志
江南通志

鄭欽字堯卿涇縣人嘉靖壬戌進士歷戶科給事條陳六事一疏愷切詳明又疏論朱衡經理運道之害官終應天府尹弟銳字遜卿隆慶辛未進士擢御史疏論張居正奪情不報出知嚴

州以府地傾東南爲建文昌閣民間由是殷阜人文竝興官終

湖廣副使

明史朱衡傳
浙江通志

周希旦字汝魯旌德人嘉靖壬戌進士由興化推官擢御史時高拱恃宮僚舊恩當國專恣希旦論之又疏請罷內閣止入贊正士習及定大峪山議累遷應天府丞時苦旱疫疏請發帑金萬以賑旋引年歸

一統志

周怡字順之太平人嘉靖戊戌進士歷吏科給事中所彈劾率當事有勢力大臣在廷多側目時相臣嚴嵩翟璵與尚書許讚互相詆訐怡疏言大臣各持意見非國之福因言陛下日事禱祠而災祲未消開輸銀例而府庫不充頒蠲租令而百姓未蘇下選將練士之命而邊境未甯御史謝瑜童漢臣以劾嵩故嵩皆假他事罪之諫諍之臣自此箝口帝覽書大怒杖之闕下錮

詔獄者再隆慶元年起故官擢太常少卿陳新政五事忤旨出

爲登萊兵備僉事改南國子監司業天啟初諡恭節

明史本傳

崔涯字若濟太平人嘉靖己丑進士擢御史糾劾不避權貴上
目爲眞御史視鯉河東陳鹽政七事歲祲請發鹽課七十萬以
賑按福建墨吏聞風解綬陳山海十二策悉中利弊歲旱請雨
立應人稱御史雨以劾冢宰汪鉉見斥會倭寇東南廷臣薦唐
順之及涯等可任用以老疾辭

一統志江南通志

汪宏字靜齋旌德舉人知阜城縣郡募軍派買馬二百匹力爭
得免薦守薊州薊鎮冒餉十餘萬按冊稽實升屯田都水員外
郎築中州齧隄漕艘以濟晉南安守乞歸

江南通志

江廷藻字南濱旌德舉人授鉅野知縣白蓮寇起率兵殲其渠
魁數郡悉靖邑多曠土督種桑棗成林遷判大名府以父疾乞

歸甯國志

焦煜字伯升太平人嘉靖癸未進士歷遷浙江按察僉事所屬多白役肆虐痛加裁抑一日偕僚佐出有瞽婦赴訴大呼孰爲焦青天者同官皆有愧色海鹽瀕海患潮築石隄七百餘丈立斗門四以時蓄洩至今賴之尋參議福建杭人罷市追送

江南通志

江瑾甯國人嘉靖中知興甯縣修邑志建鄉賢名宦祠繕完城郭皆知所先務

湖南通志

崔錦字蓮塘太平舉人歷汝州知州通溝渠築隄堰招南人教以耕耨開田數萬畝俗以饒富諸鄉祠祀不絕

甯國府志

周懌字信之太平歲貢官易州同知性勤敏設金飯於廳外訟者裹半日糧來卽剖決發遣嘗出一冤獄其人刲豕來饋中實以金懌叱去之

江南通志

劉鑄宣城人嘉靖閒知漳平縣立惠民公田杜侵隱之弊在任

九載清勤如一

福建通志

崔惟植太平舉人任永州府推官民有冤坐重辟者惟植辨而雪之甯遠蕭斗山倡亂招其黨千餘人復業賊首遂獲又剿除長沙巨盜葛縉民得安枕廣西有豪民唐廷相聚眾爭零陵界惟植靜以理之事遂解遷汝甯府同知歸

甯國府志

徐棟甯國歲貢嘉靖四十三年知靈山縣有操守事皆自裁胥吏重足而立故事每里甲遞年供役棟遣散歸農前官催徵過刻民多逃竄棟加意招徠遂俱復業供稅如故

廣東通志
新增

陳宣字汝化太平人嘉靖乙丑進士知德清縣恤民教士建石橋以濟民邑不病涉升南戶部主事督糧蘇州與王元美等倡

和甚富後判汀州卒

甯國府志

周恪字有之太平人怡弟以舉人知遂安縣多惠政重構瀛山書院朱子講學處也又修麗澤書院大興文教歷順天司理遷知濱州致仕

太平縣志引遂安志

徐大任字重夫宣城人隆慶戊辰進士授工部主事歲汰水衡冗費數十萬權稅眞州羨入一無所私權京兆尹事出俸置學田數百畝贍太學生以工部侍郎致仕神宗稱其清節爲天下第一弟大望萬厯戊戌進士知番禺縣亦以廉稱

一統志甯國府志

詹沂字浴之宣城人隆慶辛未進士知新建縣有惠政擢南給事中時張居正奪情議起省垣希旨乞畱沂本居正所取士疏具獨不署名出爲山東副使歷遷副都御史會勘妖書獄力止株連咸甯令滿朝薦忤璫被收固請得釋楚藩之變陳善後事宜凡親王違制撫按皆得白簡從事乞增入赦內從之值除夕

上以沂素廉清寂可念特賜羊酒錫幣累疏乞歸不允遂解組

出國門俟命上優許之

一統志 吳肅公傳略

陶宗儒南陵選貢任山西布政司理問升青州府通判以收礦

賊功加銜僉事尋移疾歸

甯國府志

許夢熊號印峯南陵人隆慶辛未進士知福清縣縣經倭亂夢

熊恤民惠商築堡防邊置號舍學田以課養士子葉向高林茂

槐李多見皆其所識拔號人倫冰鑑調宜都乞畱不報追送者

車不得行終南戶部主事

福建通志 江南通志

蕭彥宇思學涇縣人隆慶辛未進士歷工科給事中自塞上多

警邊吏輒假招降倖賞彥言降人不可處內地宜一切報罷從

之尋閱視陝西四鎮邊務還奏訓兵儲餉十事並允行進戶科

都給事中疏凡數十上無不關切時政初詔購金珠已命停市

以其直輸內庫彥奏不當虛外府以實內又言察吏不宜視催科爲殿最有司憚考成必重以敲朴民力不勝流亡隨之上納其言擢太常少卿以右僉都御史巡撫貴州都勻答千巖苗叛土官蒙詔不能制彥檄副使楊寅秋破擒之改撫雲南時用師隴川副將鄧子龍所部兵作亂彥調土漢兵討之斬首八十撫散脅從尋撫鄖陽進兵部右侍郎總制兩廣軍務日本購朝鮮會暹羅入貢請潛師擄其後尙書石星議從之彥言暹羅去日本萬里安能飛越大海旣而兵果不出召拜戶部右侍郎尋卒上聞哀悼賜祭葬贈右都御史諡定肅

明史本傳

貢靖國字元忠宣城人萬厯丁丑進士歷刑部員外郎張居正欲置人重辟令其子以通家刺投謁靖國還其刺曰誤矣無世誼也竟出之有大猾當坐賄御史不問靖國力爭之卒抵法出

知泉州廉平爲理移兩淮鹽運忤御史投劾歸

統志

劉復芳宣城監生隆慶間任福建福甯州同知有故人子以事

求理曰縱公亦私也屏不治入覲行李蕭然

福建通志
新增

江廷寄號鳳臺旌德人隆慶戊辰進士授行人典祀淮府卻例

金由主事遷水部郎督修慈甯慈慶兩宮著有勞績賜金幣升

湖廣分巡道布政司參議革陋規尋致仕

旌德縣志

焦位鑑字仲明太平人隆慶戊辰進士官戶部主事改職方巡

九門諸羽林材官無敢犯者

甯國府志

蔡逢時字應期宣城人萬厯丁丑進士知海鹽縣行均甲法以

三百二十畝受一役而戶勿論於是富者無詭匿貧者無偏累

役法稱平遷祠部議藩封祿制著爲令升溫處兵備副使畫策

海防斬倭七十餘級轉河南參政築沁隄懷衛間終四川布政

使

一統志
江名宦

趙健字行吾涇縣人萬厯丁丑進士由刑部主事出知辰州府教民紡績政清刑措頌聲大作歷貴州布政苗播竊發撫御有方羣醜賓服民建祠祀之尋入爲通政使不附政府乞歸天啟元年起南太僕卿以忤魏璫歸講學水西學者宗之

湖廣通志
江南通志

張守道字岸先宣城人萬厯甲辰進士授戶部主事視南徐倉中使採木過徐民輓甚困爲捐倉羨以代徭役徐民德之入厯考功郎時稱水鏡魏閣方熾遂乞南還得南太常崇禎初轉工部侍郎以積勞卒贈尙書守道性孝友常急其兄難至破產母卒廬墓三年虎繞其墓三月始去

一統志
江南通志

趙士登字應庸涇縣人萬厯庚辰進士知黃岡縣時行清丈法巡歷阡陌經界畫一豪強憚之以治最擢御史出按貴州值安

國亂協謀督撫討平之再按江西歲澇發粟賑貸全活無算廷議以河決請加賦士登力持不可竟得免歷遷僉都御史進南吏部右侍郎因水災疏請修實政以答天譴又論大僚多曠懼國事叢脞語皆切至卒贈右都御史

江西通志
江南通志

葉永盛字子木涇縣人萬曆己丑進士以御史巡鹽兩浙值中使劉成來權稅商竈震懾盛奏之疏詞愷切上悟不直奄巡按江西閹寺黨連武弁有獻店設權之議盛抗疏請斬宵人議遂罷居御史九載疏數十上直聲震中外升太僕寺卿卒

一統志

仙克謹字仲恆甯國人萬曆丁未進士知隆平縣歲旱捐俸給民穿井七百有二十民立石識之曰仙井邑無城又力城之尋調建安會水患多漂溺築隄建橋民困以濟歷山西兵備副使邊事孔棘親登陴指揮敵五載不敢犯境擢副都御史巡撫山

西條防邊策洞悉機宜引疾歸

江南通志

麻溶字明之宣城人萬曆癸未進士歷吏部郎中同官趙南星削籍溶上疏乞召還忤執政意出爲汾州守稅使馬堂肆虐致民變捕治者多所株連溶力持得釋及卒貧不能斂撫臣魏允貞以清正聞詔贈光祿卿

一統志

梅鵬祚字仲舉宣城人萬曆癸未進士由庶常改御史會鄭貴妃有寵受封時王恭妃生皇太子五年矣封不與鵬祚請進封王妃以定國本且杜他釁不報又疏言錦衣衛多中官私人相比爲奸致本兵數易語稍激詔奪其俸尋出按粵西卒於道

一統志

梅綿祚字公衍宣城舉人歷戶部主事密雲兵乏餉力言於主計者通他儲以濟兵得無譁知柳州撫猺獞多惠政子朝宗以

恩貢宰羅源戢貪弁治猾賈以除民害羅人德之

江南通志甯國府志

葉煒字文光宣城人萬曆丙戌進士知餘姚縣歷河閒守餘姚諸湖及海墾地豪家侵占煒清復之並作隄堰民免旱澇任邱

有殺人者倚叔中貴冀緩死竟論抵罪遷紹甯兵備致仕

江南通志

徐夢麟字惟仁宣城人萬曆丙戌進士歷知河南府值倭警調登州以捍禦著功屬吏忤璫懼不免力爲直之仕終南太僕少

卿

江南通志

顏文選字巽之宣城人萬曆丙戌進士由江夏知縣擢戶科給事中在垣十一月疏十三上其請建國儲疏尤激切曾推鄒元標府丞疏入久不下文選力請上怒其黨遂謫外後追贈光祿少卿

一統志

梅守相字台甫宣城人萬曆乙丑進士歷工部主事權夏鎮陳

迦河利運狀遷郎中身董其役歷塗潦冒艱險九載績成以二百六十里之迦避黃河險三百三十里仕終廣西按察使弟守極以舉人知吉安州疏濬水道土人名曰梅溪終南戶部員外守峻萬厯癸未進士爲吏部郎疏壅滯清流品終陝西參政守和萬厯戊戌進士由禮部郎督學河南嚴抑奔競歷升廣西參政

江南通志

金孚兌字吉所太平舉人萬厯辛卯授曲江知縣值歲祲請於巡撫奏蠲稅糧復發官帑賑之所活數千家韶郡密邇諸洞互市交關者稍忤其意輒羣譁殺掠孚兌內嚴守禦外布恩信犇人戒不犯境爲粵東清廉第一

廣東通志
新增

胡國鑑字正甫宣城人萬厯壬辰進士歷禮部儀制司三吳告祲疏請賑濟子尙洪入南雍預修熹宗實錄尙洪子夢龍以拔

貢知棗強省刑獄減差累釐鹽弊聲績甚著

甯國府志

濮陽春字生甫宣城人萬厯辛丑進士知海鹽縣有都諫子販私鹺捕之以石擊殺指揮使春逮治如法諸司爲之解不從歷

官郎中告歸

甯國府志

徐汝正號二寔宣城人以舉人知西鄉縣時瑞藩封漢中道西鄉驅民牽挽不勝騷擾汝正操小艇謁王爲民請命風作舟溺求屍三日始得之邑民環哭立祠祀焉

江南通志

徐騰芳字雲卿宣城人萬厯庚戌進士歷九江同知桑落洲崩潰蘆課無出請崩者蠲荒者減州民德之遷知真定升易州兵備擒賊黨于宏志等破其眾六千人終陝西參政

江南通志

馮汝京字宋臣宣城人萬厯庚戌進士以戶部郎司餉遼東遷密雲兵備鍊火器募死士制長挺鑄大戟以截古北水口有捍

禦功

甯國府志

梅國祚字景靈宣城人以歲貢任杞縣教諭薦授縣竹令蜀地濱江肩販者例徵行稅內瑤邱某監稅事勒縣竹如例又有甲夫以應徭役設黨正副統之官歲取紙價謂之紅錢國祚力請於上官並革禁之商民胥便以建振古樓不便於某官爲所讒遂拂衣歸

甯國府志

章廷訓字汝欽涇縣舉人萬厯閒任福建安溪知縣縣城東臨溪易壞前令俞仲章雖築沙岸而急湍衝齧河湑漸薄廷訓請於上官恢基改築基年而竣又鉛礦聚徒爲民隱患廷訓驅而出之以民始帖席御史周維翰署其考曰一腔忠信三載循良蓋

實錄云

福建通志
新增

高維岳字君翰宣城人以舉人署瓊州礦徒竊發鈎倭入寇伏

兵擊破之轉鞏昌郡丞督餉臨洮招番人置近甸邊賴以安遷興國知州州故苦柯潭二賊維岳至立擒其魁當事忌之投劾

歸

江南通志

詹應鵬字狎南宣城人沂之子也萬曆丙辰進士知嘉興府逆璫羅織諸賢嘉禾魏大中被逮鵬獨躬餞道左相持大慟當辨明一孝廉之冤召訊奸惡立寘上刑歷遷兩浙右布政除害興

利士民祠祀之

甯國府志

詹應鶴字九舉宣城人仕閩鹽運使參軍歲款引滯平其價以通之常股存積諸弊釐清以廉幹聞

甯國府志

鄭一元字貞起涇縣舉人知蒼梧縣縣有斷腸草愚民忿輒食之一元命犯杖二十者納草百斤聚而焚之久之種絕梧人歌

曰杖二十草十件賴鄭公腸免斷以政最遷刑部主事

甯國府志

查大期字望道涇縣舉人知湘潭縣前令方來獻嗜酒廢事大期至興利除弊邑人歌曰壺中有酒方來獻獄底無冤查大期同邑包大智字若愚以舉人攝南甯府獐獍不遵王化撫以恩威數月悉服士民至今祠祀

甯國府志

徐浩字養盛涇縣人爲永嘉丞邑每歲有清軍例錢數百金一文不取同邑左棠芳字泰華署路南州清勤甚著後升獨山知

州

甯國府志

趙璫字美中涇縣人知清遠縣有能聲巡撫趙可懷稱爲循良第一書第一人三字額贈之

甯國府志

汪冀夔字一竄南陵人萬歷乙未進士知襄陽縣襄故劇邑夔治繁如飭嘗鞠疑案出大辟十七人襄民德之爲刻辨冤錄以最升南戶部主事

甯國府志

管橋字五陵南陵人萬曆乙未進士知長泰縣夙苦麻餉橋除之礦役大興多藉爲姦利力請禁戢遷大理評事雪疑獄大辟者數人擢監察御史指劾不避權貴解組歸

甯國府志

戴新字浴日南陵人萬曆甲辰進士以工部主事出知甯波府櫛剔諸弊眾憚嚴整郡瀕海數苦倭寇造船泊械防禦甚周終湖廣武漢道

江南通志

劉有源字工峯南陵人萬曆丁未進士由仁和令擢御史有人措餉二疏言甚切至收治東城大猾中貴爲解不聽仕至江西按察使性友愛嘗以己田分給伯仲卒年八十四

江南通志

趙士際字維行涇縣人以舉人知雒容縣調宣化創建城池擢羅定州州初歸版籍規畫拊循民大悅附轉汾州同知恤災賑荒全活無算所在尸祝子不盈行誼敦睦喜讀周邵書

羅定州志

南通志

郭忠信字希曾與兄忠曾並甯國諸生從羅汝芳講學耿恭簡督學南畿求實學篤行之士合十四郡得十一人兄弟皆與焉隆慶中忠信以恩貢判辰州忤時相謫婺源教諭以八條造士

人稱梅井先生

江南通志

黃一騰字仲昇甯國人萬曆戊戌進士觀政兵部上武備十議出知完縣縣多盜一騰舉行保甲講律令兩月俗大革調知南昌有虛丁虛米爲民累力爲清覈時稅璫潘相驕橫至繫辱宗室騰數其過使減驕騎潘怒撼以危言騰蔑如也擢儀制司主事後升山東布政司參議

江南通志

張星字文宿宣城人以恩貢知館陶置廉貯倉以備賑擢河間同知調天津饑民五十人以避寇至吏疑而捕之星悉縱去督

撫不憚曰某不惜一官活一命況五十人乎會璫虛惟甯監津

通軍星不肯隨眾伏謁遂免歸

江南通志

葉時寔字瑤山南陵人以貢歷涿州知州有訟者輒愀然諭以里鄰睦而後風俗醇委曲開導民薰其德獄訟衰息時稱循良

第一

甯國府志

劉維清南陵人以武進士歷薊鎮遊擊舊操練之日軍士各有例獻維清一無所受轉浙江北洋遊擊乘風出汛不避艱險民爲立祠招寶山後升湖廣鎮筓參將

甯國府志

管一鯨字若谷南陵人知新津縣廉潔愛民奢會之亂運籌保境遷知養利州土司龍甯內訌鯨奉委輯定之以勞致疾卒官

甯國

府志

吳尙默字元垣涇縣人萬曆丙辰進士知義烏縣以楊漣左光

斗薦擢御史出按蜀奢崇明之亂會督撫合謀剪滅之尋按粵
東海寇猖獗設方略控扼得無事崇禎初累疏乞窮治魏崔奸
黨薦起廢謫諸名臣多見採納以論救錢龍錫忤旨謫守承天
府時流寇大擾練鄉兵數千備守禦官至本省右布政卒江南通志
鄭極祥字章義涇縣舉人歷永年推官守禦松山有功擢兵部
主事調南刑部員外郎多所平反以清節聞終寶慶知府甯國府志
王廷相字中鉉涇縣人官沔陽州判時播逆作亂督府以廷相
為監紀汰大帥掠殺平民冒功之罪全活無算遷簡州州同值
歲祲賑濟有方尋擢崇國左長史甯國府志

許成器字道甫甯國人以舉人歷翰林孔目預修玉牒適辰沅
餉匱兵噪擢為兵備副使至則撫而戢之告歸成器性孝友撫
兩弟遺孤如所生甯國府志

汪若極字子無旌德人萬曆進士知仁和縣催科甚煩若極設
易知單法悉汰羨餘民輸將恐後擢御史疏上六事其止內操
一條觸瑞怒出按粵西會有旨責成撫按措銀十五萬若極以
疏力諍得免仕終太僕少卿

江南通志

胡篤卿字培元太平人萬曆癸未進士歷守漢陽雲南撫州三
郡所至有聲黔國公嘗薦其才可大用致仕歸

甯國府志

周文澤旌德人萬曆中知永明縣延見父老面詢疾苦條餉悉
令花戶自封投櫃侵蝕逋欠諸弊皆革縣有小水營更番戍守
後爲營弁乾沒營惟空伍無裨緩急文澤申請撤之歲省額費

甚多

湖南通志

崔廷健字孟乾太平人萬曆壬辰進士官行人奉使朝鮮言論
風采屬國敬憚比歸以方物珍貨爲贖悉卻謝督杭州抽分商

旅稱便擢四川分守道兼攝七印以勞卒

南國府志

崔師訓字惟承太平人萬厯戊戌進士授戶部主事監崇文門

稅吏不敢上下其手再監易州稅盜金盈萬悉簿畱公癸卯典

蜀試所取士醢正爾雅歷遷福建參政不以寸絲粒粟擾民防

海冒暑卒於官民祀之

江南通志
福建通志

朱諭涇縣人萬厯中知武岡州修學宮建倉儲手輯州志創隄

關港利永而民不病

湖南通志

李元調字劬雲太平人萬厯戊戌進士知奉新縣勸農興學德

猾恤貧一時翕然稱賢父母同邑方立誠字豫之以舉人知絳

州多善政

南國府志

王綱字象賢太平舉人知甯鄉縣值歲凶多逋賦綱撫循有術

民樂輸不病執法不移時稱鐵面而接見賢士大夫甚恭以治

最知晉州置學田贍士人文丕振民祠祀焉升漢陽知府未任

卒

湖南通志

王參字惟贊太平舉人知費縣兵燹後民多流亡捐資易牛墾荒課種民漸復業以搜賊冒雨卒士民祠祀同邑胡廷珪以貢生任平原教諭令催衿逋過峻諸生曉曉幾釀事廷珪竭力調劑令與士均感其誠事遂釋

甯國府志

王世能宣城人萬厯閒爲山西運使恐商困於催科不差役滋擾親督採鹽商人獲利卒於官商民思之

山西通志

郭建邦字爾立旌德人天啟壬戌進士授行人值璫餒熏灼建邦恥之家居者六年璫敗起兵科給事中歷遷通政司通政戶部以兵餉孔亟檄加山稅建邦力言得免遷太僕寺卿升順天府尹久旱虔禱三日雨隨注因疏陳民間疾苦請修補助之政

擢工部侍郎乞歸卒

江南通志

戴士憲南陵人以舉人署亳州學正流寇劫掠爲州守畫捍禦

策城賴以全

甯國府志

趙士發字性宇涇縣人以貢生攝永州府事有宗子獲罪下楚

撫勘問廷質時以銅肘擊殺巡撫趙可懷遂成大獄士發力白

制府奏寬株累反側以安子不逸字鼎石由文華殿中書歷兵

部員外郎魏瑞欲引進之亟請差歸遂不復出

甯國府志

趙碩來字復之涇縣舉人知上杭縣俗多巫蠱案以重法火其

書積患頓息奏最擢邵武府丞同邑董哲官紹興府判賑荒愛

士人甚德之

甯國府志

徐日隆字崇道宣城人知景甯縣地故多盜無城日隆創築之

改建學宮集諸生講業升沂州守已前卒

甯國府志

徐律時字乾若宣城人崇禎庚辰進士知膠州清介自勵土寇

訖發親率州人防禦民得安堵

江南通志

劉維仁字孔安宣城人崇禎甲戌進士歷知錢塘鉛山魏縣潔已愛民遇亂歸絕意仕進同邑鍾震陽字百里崇禎癸未進士知山陰縣築塘捍海部民爲之立碑

江南通志

丁益高字襄明宣城人官餘杭縣丞時武林兵寇交集邑無正令益高獨攜一老嫠病胥晝夜綏輯冒白刃奔走會城請兵解餉杭郡屬邑多遭焚掠惟餘杭城郭獨完

甯國府志

許久申字日華南陵人歷署廣西景東二府事廣西治偏沙夷苦劫掠久申督土司兵親冒矢石宣諭威德郡境以安其在景東與威遠州爲鄰負逋者多逃入之久申乃令復還故業給以牛種歲來歸者二千餘人景東土司與沅江土官交惡久申將

二十人往諭命取酒爲兩家設誓鬪遂解

甯國府志

王世幹字旋宇南陵人攝嶧縣事白蓮賊倡亂眾數萬幹率義勇戰於邑之鳳山擒其巨魁餘黨悉逐以里誤去官士民擁道

泣送

甯國府志

朱萬鎰字玉完甯國人以拔貢知義甯縣潔已奉公仁聲雅著永甯州苗多梗化撫軍林廉其才檄攝州事單騎就道不半載皆懾服升沅江同知致仕士民攀轅數百里不絕

甯國府志

朱邦衡字士平甯國人任太平教諭以不開劣生被劾時升虞城令或咎之曰邑實無之可誣人自利乎卽日放舟歸

甯國府志

汪承詔字仲宣甯國人崇禎辛未進士授武昌知縣擢御史巡按湖廣以章疏愷直爲當事所忌遂歸

甯國府志

仙作勵字石初甯國人克勤子也克勤官職方作勵閱歷典故

熟諳形勢多所補益後授武英殿中書舍人侍父歸遂不出居里值歲祲散財出粟全活無算

國朝順治初土寇猖獗聚族自保捐餉請兵邑賴以安

甯國府志

孫正氣太平人官甯遠衛經歷新提川兵糧乏鼓噪正氣諭以利害各還營伍流賊攻城穴地以避火礮用被裏硝黃鐵繩縛而縋之賊不能避遂退以功擢甯遠通判

甯國府志

程言字颺伯太平人崇禎癸未進士授弋陽知縣以母老不赴言初以舉人秉鐸當塗適有兵躪畫策捍禦與守令分當一面彌月始戢年饑捐賑爲巨姓倡士民立石誦德

甯國府志

胡天錫號聖泉太平人官山東單縣尉奉檄治河河潰決不常天錫以土易石築之堅厚省費不貲而河濶晏如時萬眾蜎聚酷暑疫作天錫知醫捐財市藥以給病者所活不可勝計擢管

河同知以病告歸單人祠祀

太平縣志
引單縣志

趙必遷太平人父文昌兩任蘭溪縣丞署縣事多惠政必遷以選貢知興文縣清介不畏強禦初赴任有大慙趙侍者於中途謁餽千金卻勿受因廉得其積惡受毒者百餘家遂收之而寘於法民心大快擢荆府審理正告歸

甯國府志

項如皋字孟凱太平人以崇禎庚辰特用授刑部主事時黃道周忤旨解學龍等並以論救得罪如皋抗疏極言事得解卒於官貧無以斂雷續祚劉理順爲經紀其喪槨始得歸

一統志

蕭思倫涇縣人官瀏陽縣丞崇禎中攝縣事習知民困力除苛

政邑人感之

湖南通志